

四庫全書

集部

欽定四庫全書

宋詩鈔卷六十六

內閣中書舍人吳之振編

陸游劔南詩鈔三

村夜

寂寂山村夜悠然醉倚門月昏天有暈風軟水無痕迹
為遭讒遠身由不仕尊敢嗟車馬絕同社自雞豚

困甚戲書

官如枝頭乾不受雨露恩身如水上浮泛泛寧有根刈茆
以苦屋縛柴以為門故人分祿米隣父餉魚飧前門吏
徵租後門質襦裙不敢謀歲月且復支朝昏雨餘幽花
折亦可侑清尊吾生信已乎終老此山村

戲詠山陰風物

萬里秦吳稅駕遲還鄉已嘆鬢成絲城邊綠樹山陰道水際

朱扉夏禹祠項里楊梅鹽可徹

太白梁國吟云玉盤楊梅為君設吳鹽如花皎白雪不知

楊梅酸者乃薦以鹽佳品未嘗用也

湘湖蓴菜鼓偏宜

蓴菜最宜鹽鼓所謂未下鹽鼓者言下鹽鼓則

非羊酪可敵蓋
言蓴菜之美爾

圖經草草尚堪恨好事它年采此詩

癸丑七月二十七日夜夢遊華嶽廟

驛樹秋風急闕城算角悲平生忠憤意來拜華山祠
碑刊偽正朔祝改舊祠壇神亦豈堪此出門山雨寒

僕頃在征西大幕登高望闕輔樂之每冀王師拓
定得卜居焉暇日記此意以示子孫

八月殘暑退秋聲滿庭樹豈無四方志衰病迫霜露
彼邊鄙人稔惡天震怒南北會當一老吾悲不遇子孫

勉西遷俗厚吾所慕約已收孤嫠教子立門戶黍稌暗
阡陌鵲雉足七箸未為河渭民勿憚關山路

秋夜感舊十二韻

冷螢綴蓬根忽復照高樹年光逝不畱百感集遲莫往

者秦蜀間慷慨事征戍猿啼鬼迷店馬噤飛石舖

鬼迷店在

大散關下飛石舖在小益道中嘗有崩石

危嶺高入雲朽棧劣容步天近星

宿大江惡蛟鼉怒意氣頗自竒性命那復顧最懷清渭

上衝雪夜掠度封侯細事爾所冀垂竹素兜鍪竟何成

豈獨儒冠誤當時
妄校尉旗纛
今照路浩歌
遂成章聊
慰老不遇

秋晚間步隣曲以予近嘗卧病皆欣然迎勞

放翁病起出門行
績女窺籬牧豎迎
酒似粥醲知社到
甍如盤大喜秋成歸
來早覺人情好
對此彌將世事輕
紅樹青山只如昨
長安拜免幾公卿

雨夜

歲晚茅茨劣自容
齒搖將脫髮將童
心遊萬里關河外

身卧一窗風雨中
醫不可招惟忍病
書猶能讀足忘窮
夜闌睡覺蛩聲裏
時見燈花落碎紅

夢至洛中觀牡丹繁麗溢目覺而有賦

兩京初駕小羊車
顚顚江湖歲月賒
老去已忘天下事
夢中猶有洛陽花
妖魂艷骨千年在
朱彈金鞭一笑譁
寄語春光須愛惜
莫輕摧折委風沙

秋夜獨酌

壯志隨年減
羈愁與夜長
月高寒暈淡
花坼露華香
仕

畏讒銷骨歸判酒腐腸青燈寫孤影相勸盡餘觴

自嘲

歲月推遷萬事非放翁可是白頭癡此生竟出古人下
有志尚如年少時僻學固應知者少長歌莫問和予誰
自嘲自解君毋怪老大從人百不宜

數日秋氣已深清坐無酒戲題長句

漸近重陽天氣嘉數椽茆竹淡生涯山童擁篲埽黃葉
鄰女傍籬收碧花避俗要生輪四角出門何啻路三叉

晚窗酒盡無多歎試問前村好事家

東村散步有懷張漢川

扶杖村東路秋來始此回寒鴉盤陣起野菊卧枝開憂
國丹心折懷人雪鬢催房湖八千里那得尺書來

排悶

四十從軍渭水邊功名無命氣猶全白頭爛醉東吳市
自拔長刀割彘肩

西塞山前吹笛聲曲終已過雒陽城君能洗盡世間念

何處樓臺無月明

放歌行

君不見汾陽富貴近古無二十四考書中書又不見慈
明起自布衣中九十五日至三公人生窮達各有命拂
衣徑去猶差勝介推焚死終不悔梁鴻寄食吾何病安
用隨牒東復西獻諛耐辱希階梯初無公論判涇渭徒
使新貴矜雲泥稽山一老貧無食衣破履穿面黧黑誰
知快意舉世無南山之南北山北

山頭石

秋風萬木實春雨百草生造物初何心時至自枯榮惟
有山頭石歲月浩莫測不知四時運常帶太古色老翁
一生居此山脚力欲盡猶躋攀時時撫石三歎息安得
此身如爾頑

野興

老去癡頑百不能非醒非醉日騰騰敲門惟有徵租吏
好事原無送米僧舊俗不還誰復念古書雖在漸難憑

平生意氣今如此惆悵西窗半夜燈

古築城曲

築城聲酸嘶漢月傍城低白骨若不掩高與長城齊
嶧山訪秦碑斷裂無完筆惟有築城詞哀怨如當日

山園

山泉引派漲清池野蔓移根種短籬藝果極知非老事
接花聊復效兒嬉提壺言語開顏聽斷木衣襦緩步窺
莫笑題詩還滿紙小園幽事要君知

古別離

孤城窮巷秋寂寂美人停梭夜歎息空園露濕荊棘枝
荒蹊月照狐狸迹憶君去時兒在腹走如黃犢爺未識
紫姑吉語元無據况憑瓦兆占歸日嫁來不省出門前
魂夢何因識酒泉粉綿磨鏡不忍照女子盛時無十年
病起山居日有幽事戲作

鶴骨龜腸欲不禁扶衰初喜罷呻吟盆山冰釋書窗暝
藥竈香濃道院深筆健乍臨新獲帖手生重理舊傳琴

閉門局促還堪恨雲海何時豁此心

水村曲

山村今年晚禾旱奏下民租蠲大半水村雨足米狼戾
也放三分慰民意看榜歸來迭歌舞共喜清平好官府
老翁猶記軍興時汝輩少年那得知

賽神曲

擊鼓坎坎吹笙鳴鳴綠袍槐簡立老巫紅衫繡裙舞小
姑烏白燭明蠟不如鯉魚糝美出神厨老巫前致詞小

姑抱酒壺願神來享常懼娛使我嘉穀收連車牛羊莫
歸塞門閭雞鶩一母生百雛歲歲賜粟年年蠲租蒲鞭
不施園土空虛束草作官但形模刻木為吏無文書淳
風復還義皇初繩亦不結況其餘神歸人散醉相扶夜
深歌舞官道隅

涼州行

涼州四面皆沙磧風吹沙平馬無迹東門供帳接中使
萬里朱宣布襖勅勅中墨色如未乾君王心念兒郎寒

當街謝恩拜舞罷萬歲聲上黃雲端安西北庭皆郡縣
四方朝貢無征戰舊時戎馬陷關中五大原頭作邊面

七十

七十殘年百念枯桑榆元不補東隅但存隱具金鴉嘴
那夢朝衣玉鹿盧身世蠶眠將作繭形容牛老已垂胡
客來莫問先生處不釣娥江即鏡湖

正月二十日晨起弄筆

深院窗扉曉色遲新愁宿醉兩參差雨聲欲與夢相入

春夢不隨人共衰
零落殘梅臨小約
縱橫野水赴清池
物華撩我緣何事
似恐新年漸廢詩

新闢小園

西戍歸來鬢已霜
生兒又過乃翁長
眼明身健殘年足
飯軟茶甘萬事忘
學廢僅能書姓字
客來懶復倒衣裳
山園寂寂春將晚
酷愛幽花似蜜香

新展山園半畝強
笑人車馬出籠坊
山禽乍暖慙慙語
野蘢無風自在香
點點水紋迎細雨
疎疎籬影界斜陽

出門遙向隣翁說釋耒相從共一觴

久不得張漢州書

儘道三巴遠那無一紙書
衰遲自難記不是故人疎

春晚村居

一事元無可得忙悠然半醉倚胡牀
牡丹枝上青春老燕子聲中白日長
身世已如風六鷁文章仍似閨黃楊
太平有象無人識南陌東阡擣麴香

遊雲山諸蘭若

花過木陰合溪雲生莫涼牛行響白水鷺下點青秧古

寺宛如昔穉松森已行

道旁松及三十年則僧輒伐去復種小者予自幼歲至今已見

三種
矣
耆年不下榻童子為燒香

園中小飲

此老胸中萬頃寬小園幽徑日追歡寧教酒欠尋常債
恥就人求本分官高柳陰濃烟欲暝
花紅濕露初溽

時月桂方盛開
要知澤國年光晚已過清明尚淺寒

鳥啼

野人無歷日鳥啼知四時二月聞子規春畊不可遲三月聞黃鸝幼婦閨蠶饑四月鳴布穀家家蠶上簇五月鳴鴉舅苗稚憂草茂人言農家苦望晴復望雨樂處誰得知生不識官府葛衫麥飯有即休湖橋小市酒如油夜夜扶歸常爛醉不怕行逢灞陵尉

題陽關圖

誰畫陽關贈別詩斷腸如在渭橋時荒城孤驛夢千里遠水斜陽天四垂青史功名嘗蹭蹬白頭襟抱足乖離

山河未復風塵暗一寸孤愁只自知

夜分不寐起坐園中至旦

涼氣蘇衰疾幽情入杖藜月驚孤鵲起天帶衆星西
松菊今彭澤山川古會稽清吟殊未愜喔喔已晨雞

醉睡初覺偶作

小圃醒還醉幽窗起復眠虛明注香地清潤刷花天
老去才雖盡窮來志益堅阿瞞那可語平日笑橋玄

間中

閒中高趣傲羲皇身卧維摩示病牀活眼硯凹宜墨色
長毫甌小聚茶香門無客至惟風月案有書存但老莊
問我東歸今幾日坐看庭樹六番黃

悶極有作

貴已不如賤狂應又勝癡新寒壓酒夜微雨種花時堂
下藤成架門邊枳作籬老人無日課有興即題詩

三峽歌

乾道庚寅予始入蜀上下三峽屢矣後二十五年歸

畊山陰偶讀梁簡文巴東三峡歌感之擬作九首實
紹熙甲寅十月二日也

神女廟前秋月明黃牛峽裏猿聲危途性命不容恤
百丈牽船侵夜行

不怕灘如竹節稠新灘已過可無憂古粧戕戕一尺髻
木盞銀盃邀客舟

十二巫山見九峯船頭彩翠滿秋空朝雲暮雨渾虛語
一夜猿啼明月中

錦繡樓前看賣花
麝香山下摘新茶
長安卿相多憂畏
老向夔州不用嗟

險詐沾沾不媿天
交情回首薄如烟
東遊萬里雖堪樂
灩澦瞿塘要放船

蠻江水碧瘴花紅
白舫黃旗無便風
涪萬四時常避水
棚居高出亂雲中

亂插山花簪子紅
蠻歌相和漲西東
忽然四散不知處
踏月捫蘿歸峒中

萬州溪西花柳多四鄰相應竹枝歌問君今夕不痛飲
奈此滿川明月何

我游南賓春莫時蜀船曾繫挂猿枝雲迷江岸屈原塢
花落空山夏禹祠

書室明暖終日婆娑其間倦則扶杖至小園戲作
長句

美睡宜人勝按摩江南十月氣猶和重簾不捲畱香久
古硯微凹聚墨多月上忽看梅影出風高時送鴈聲過

一杯太淡君休笑牛背吾方扣角歌

初冬

老客人間百事慵樂哉閉戶過今冬
朝爐獸炭騰紅焰夜榻蠻氈擁紫茸
蝟刺圻蓬新粟熟鵝雛弄色凍醅濃
題詩正自消閒日本不爭先萬戶封

幽居

雨霽雞棲早風高鴈陣斜園丁刈霜稻
村女賣秋茶缺井磨樵斧枯桑繫釣槎
客來那用問此是放翁家

冬夜獨酌

寒水茫茫浸月明疎鐘杳杳帶霜清一樽濁酒有妙理
十里荒雞非惡聲物外雖增新跌宕胸中未洗舊崢嶸
頽然坐睡蒲團穩殘火昏燈伴五更

雜詠園中菓子

不酸金橘種初成無核枇杷接亦生珍產已從幽圃得
濁醪仍就小槽傾

漿石榴隨隨作節蠟櫻桃與酪同時兩株偶向林邊種

可喜今年墜折枝

架垂馬乳收論斛
港種雞頭采滿船
龜鼎若為占食指
麪車未用墮饒涎

歲莫感懷

家世本無年
甲子近一周
小子獨何幸
七十今平頭
往者收朝迹
亟欲求歸休
厚恩許奉祠
得祿歲愈憂
三釜不及親
顧為妻子留
何由洗此媿
欲挽天河流

高皇昔中興
風雨躬沐櫛
一士未嘗遺
萬里皆馳日
廉

聽聞言路虛懷詢得失孤臣實草芥亦獲對宣室龍顏
宛在目德不報萬一橋出松栢寒淚盡史臣筆

王師宿梁益行臺護諸將腐儒添辟書萬里至渭上旌
旗照闕路風雪暗戎帳堂堂鐵馬陣疊疊木牛餉誰知
骨相薄空負心膽壯回首二十年撫事增悲愴

在昔祖宗時風俗極粹美人材兼南北議論忘彼此誰
令各植黨更仆而迭起中更兵革甌此風猶未已臣不
難負若生者固賣死儻築太平基請自厚俗始

井地以養民整整若碁畫初無甚貧富家有五畝宅哀
哉古益遠禍始開阡陌富家役千奴貧老無寸帛困窮
禮義廢盜賊起促迫誰能講古制壽我太平脉

贈應秀才

過宋不見元城公渡淮不見陳了翁當時人人皆太息
至今海內傾高風老夫七十居鄉縣齷齪龍鍾何足見
辱君雪裏來叩門自說辛勤求識面我得茶山一轉語
文章切忌參死句知君此外無他求有求寧踏三山路

山園雜詠

祠祿畱人未挂冠
山園三畝著身寬
百年竟向愁邊老
萬事元輸靜處看
花徑糝紅供晚醉
月天生暈作春寒
汗青事業都忘盡
時賴吾兒舉話端

殘春終日在林亭
散髮披衣醉復醒
科斗已成鼃閭閻
櫻桃初結子青青
魚遊滄海寧濡沫
禽慕雕籠即剪翎
薄晚東風吹小雨
笑攜長鏡伴畦丁

春晚懷山南

梨花堆雪柳吹絲常記梁州古驛前二十四年成昨夢
每逢春晚即悽然

壯歲從戎不憶家梁州表馬鬪豪華至至夜夜尋春夢
猶在吳園藉落花

身寄江湖兩鬢霜金鞭朱彈夢猶狂遙知南鄭城西路
月與梨花共斷腸

春晚雜興

澤國固多雨莫春猶薄寒兒童葺茶舍婦女賽蚕官閑

世年雖往為農興未闌窮途得一飽亦足慰艱難

池面萍初紫牆頭杏已青攜兒撐小艇留客坐孤亭相
法無侯骨生平直酒星正須遺萬事莫遣片時醒

小市湖橋北幽居石埭西蒲深姑惡哭樹密姊歸啼山
茗封青箬村酤圻赤泥平生汗簡手投老慣扶犁

病瘍無意緒閉戶作生涯草草半盃飯悠悠一盞茶笑

穿居士屨間看女郎花

唐人謂辛夷為女郎花園
中有此花一叢二百朵

莫問

明朝事忘家即出家

齋中雜題

列屋蛾眉不足誇，可齋別自是生涯。
閒將西蜀團窠錦，自背南唐落墨花。

棐几硯涵鸛鵒眼，古奩香斲鷓鴣斑。
絕知造物慇懃意，成就衰翁到死閒。

上巳書事

單衣初著下湖天，飛蓋相隨出郭船。
得雨人人喜秧信，祈蠶戶戶斂神錢。
黃雞煮臠無停筯，青韭淹菹欲墮涎。

丞相傳聞又三押衡茅未改日高眠

春夏之交風日清美欣然有賦

芳潤園林不似貧年光無盡逐番新來禽顏色不禁雨
搏黍語言如惜春身外豈關吾輩事鏡中已換昔時人
神僊定未超塵俗猶插金貂侍帝晨

初夏行平水道中

老去人間樂事稀一年容易又春歸市橋壓擔蓴絲滑
村店堆盤豆莢肥傍水風林鷄語語滿園烟草蝶飛飛

郊行已覺侵微暑小立桐陰換夾衣

幽棲

閒人了無事地僻稱幽棲
啖米留雞食移琴避燕泥
桐生窗欲暗筍長徑還迷
不作容車計門閭儘放低

誰謂幽棲陋茅茨足庇牀
雨便梧葉大風度練花香
浴佛兒童喜繅絲婦女忙
竭來三十載吾鬢固宜霜

乾道丙戌

始卜居鏡湖之三
山今甫三十年矣

十月十七日予生日也孤村風雨蕭然偶得二絕

句予生淮上是日平旦大風雨駭人及予墮地

雨乃止

少傅奉詔朝京師檣船生我淮之湄宣和十年冬十月
猶是中原無事時

我生急雨暗淮天出沒蛟鼉浪入船白首功名無尺寸
茅簷還聽雨聲眠

枕上偶成

放臣不復望脩門身寄江頭黃葉村酒渴喜聞疎雨滴

夢回愁對一燈昏
河潼形勝寧終棄
周漢規模要細論
自恨不如雲際鴈
南來猶得過中原

舍北閒望作六字絕句

潘岳一篇秋興李成八幅寒林
舍北偶然倚杖盡見古人用心

題菴壁

身似蝸牛麤有廬
却緣無用得安居
地爐封火欺寒雨
紙閣油窗見細書
麤熟山僧分餽飣
船來溪友餉薪樗

閉門莫笑衰顏甚讀易論詩亦未疎

貧甚作短歌排悶

閒何濶逢諸葛畏人常憂不得活事不諧問文開不躡
權門更可哀即今白髮如霜草一飽茫然身已老惟有
躬耕差可為賣劍買牛悔不早年豐米賤身獨饑今朝
得米無薪炊地上去天八萬里空自呼天天豈知

雨夜有懷張季長少卿

放翁雖老未忘情獨卧山村每自驚鼎鼎百年如電速

寥寥一笑抵河清
梅初破
藟行江路燈欲成
花聽雨聲
正用此時思劇飲
故交零落愴餘生

春思

七十老翁身退耕
可憐未減舊風情
典衣取酒那論價
秉燭看花每到明
江浦時時逢畫楫
寺樓處處聽新鶯
此生無復陽關夢
不怕尊前唱渭城

丙辰上元前一日

弊裘破帽髮鬢髻
宛似山房罷講僧
身病不禁連夜雨

家貧只挂去年燈
脩祿柳外掀樓角
危檻雲間露塙層
自笑閒遊本無定
興闌隨處倚枯藤

懷舊

狼烟不舉羽書稀
幙府相從日打圍
最憶定軍山下路
亂飄紅葉滿戎衣

翠崖紅棧鬱參差
小益初程景最奇
誰向毫端收拾得
李將軍畫少陵詩

幽居初夏

湖山勝處放翁家
槐柳陰中野徑斜
水滿有時觀下鷺
艸深無處不鳴蛙
籜龍已過頭
番筍木筆猶開第一花
歎息老來交舊盡
睡餘誰共午甌茶

六月二十四日夜分夢范至能李知幾尤延之同

集江亭諸公請予賦詩記江湖之樂詩成而覺
忘數字而已

露箬霜筠織短篷
飄然來往淡烟中
偶經菱市尋谿友
却揀蘋汀下釣筒
白菡萏香初過雨
紅蜻蜓弱不禁風

吳中近事君知否團扇家家畫放翁

閒居自述

自許山翁嬾是真紛紛外物豈關身
花如解笑還多事石不能言最可人
淨掃明窗憑素几閒穿密竹岸烏巾
殘年自有青天管便是無錐也未貧

秋雨初霽試筆

墨入紅絲點漆濃閒將倦筆寫秋容
雨聲已斷時聞滴雲氣將歸別起峯
斜日半穿臨水竹好風遙送隔城鐘

遠遊更動輕舟興太息何人解見從

舍北搖落景物殊佳偶作

路擁新霜葉溪餘舊漲沙
栖鳥初滿樹歸鳴各知家
世事元堪笑吾生固有涯
南村聞酒熟試遣小童賒
屋角成金字溪流作縠紋
斜通小橋路半掩夕陽門
孤艇衝烟過疎鐘隔塢聞
杜門非獨病實自厭紛紛
艸徑人稀到柴扉手自開
林疎鴉小泊溪淺鷺頻來
簷角除瓜蔓牆隅斲芋魁
東鄰膳肉至一笑舉新醅

醉中信筆作四絕句既成懼觀者不知野人本心

也復作一絕

麥野桑村有酒徒過門相覓醉相扶朱門日日教歌舞
也有儂家此樂無

過得一日過一日人間萬事不須謀鄰家幸可賒芳醞
紅藥何曾笑白頭

今朝賣穀得青錢自出街頭買彘肩艸火燎來香滿屋
未容下箸已流涎

老病人間足畏途怕人渾似怕於菟
晴明頗動青鞵興
先探門前有客無

治道巍巍本易成
狂言安得略施行
太平事業人皆見
不計封倫死與生

睡起至園中

春風忽已遍天涯
老子猶能領物華
淺碧細傾家釀酒
小紅初試手栽花
野人易與論肝肺
俗語誰能挂齒牙
更欲世間同省事
勾回蟻戰放蜂衙

雨中作

三日雨頻作昏昏饒睡眠
泥深散酒市風惡惱燈天
茆屋松明照茶鐺雪水煎
山家自成趣撫枕寄悠然

短髮白如絲梅花似舊時
掩屏愁入夢隱几雨催詩
病為陰天劇春緣閨歲遲
非闕畏車馬衰甚實難支

立春日

花壓烏巾酒滿卮舊逢春日恨春遲
如今病卧孤村裏過了新春也不知

春行

九日春陰一日晴，強扶衰病此間行。
猩紅帶露海棠濕，

鴨綠平堤湖水明。

杜子美曉看紅溼處，花重錦官城。李太白蜀江紅且明，用溼字明字可謂

奪造化之功，世未有拈出者。

酒賤柳陰逢醉卧，土肥稻壟看深耕。山

翁莫道渾無用，解與明時說太平。

賞花至湖上

吾國名花天下稀，園林幾日敞朱扉。
蝶穿密葉常相失，蜂戀繁香不記歸。
欲過用愁風蕩漾，半開却要雨霏微。

良辰樂事真當勉莫遣忽忽一片飛

莫春

數間茆屋鏡湖濱萬卷藏書不救貧燕去燕來還過日
花開花落即經春開編喜見生平友照水驚非曩歲人
自笑請纓心尚在憑高慷慨欲忘身

七十三吟

七十三年事事新涵濡幸作六朝民髮無可白方為老
酒不能賒始覺貧末路已悲身是客此心猶與物為春

柴門勿謂常岑寂時有鄉鄰請藥人

舍北行飯書觸目

晚飧初潑一甌茶曳杖間行興未涯
煙樹參差墨濃淡
風鴉零亂字橫斜
夕陽偏傍平橋路
寒蝶猶依晚菊花
堪笑衰翁耐荒寂
短衣霑露未還家

春近山中即事

節物貧家有故常
春盤蠟粥逐時忙
悠悠歲月催雙鬢
艸艸雞豚薦一觴
人意自殊平日樂
梅花寧減故時香

小園新展西南角
挂樹青蘿百尺長

雪夜感舊

江月亭前樺燭香
龍門閣上馱聲長
亂山古驛經三折
小市孤城宿兩當
晚歲猶思事鞍馬
當時那信老耕桑
綠沈金鎖俱塵委
雪洒寒燈淚數行

將進酒

我欲挽住北斗杓
常指蒼龍無動搖
春風日夜吹艸木
只有榮盛無時凋
我欲剗斷日行道
陽烏當空月杲杲

非惟四海常不夜亦使人生失衰老如山積麴高崔嵬
大江釀作蒲萄醅頽然一醉三千盃借問白髮何從來

雜感

志士山棲恨不深人知已是負初心不須先說嚴光輩
直自巢由錯到今

百年鼎鼎成何事寒暑相催即白頭縱得金丹真不死
摩挲銅狄更添愁

山人那信宦途艱強著朝衣趂曉班豪氣不除狂態作

始知只合死空山

故舊書來訪死生
時聞剝啄叩柴荆
自嗟不及東家老
至死無人識姓名

幽居

小舫藤為纜
幽居竹織門
短籬圍藕蕩
細路入桑村
魚鱗槎頭美
醅傾粥面渾
殘年謝軒冕
猶足號黎元

夏日

過眼春光久已空
曬絲擣麥又匆匆
新泥滿路梅黃雨

古木號山月，暈風角黍芟。新聞罇俎靈符墨，涇照房櫳。
歲華不為衰翁駐，且付餘生一笑中。

雨斷雲歸旋作晴，尚餘紅濕在簾旌。燕雛掠地飛無力，
梅子臨池墜有聲。米糲解包供午餉，萍蠶傍枕折朝醒。
此翁不負頑軀處，捫腹時時遠舍行。

感舊

要識梁州遠，南山在眼邊。霜郊熊撲樹，雪路馬蒙羶。慘

淡遺壇側

拜韓信壇至今猶存

蕭條古廟壩

沔陽有蜀後主所立武侯廟

百詩

猶可想歎息遂無傳

予山南雜詩百餘篇舟行過望雲灘墜水中至今以為恨

夜涉南沮水朝過小益城梯山天一握度棧土微平雨

近秦雲暗霜高隴月明至今孤夢裏喝馬有遺聲

喝馬皆七

字韻語聞之
悲愴動人

早發金堆市更衣石櫃亭灘聲秋後壯山色雨餘青道

凜愁車轍橋危避駝鈴功名竟何在撫事感頽齡

塵土暗貂裘森然白髮稠年光真袞袞吾事竟悠悠馬

宿平沙夜

軍中馬及廐卒夏夜皆露宿沙上

烽傳絕塞秋

平安火竝南山來至山南

城下故人零落盡追寫只添愁

秋夕露坐作

銀河半落露華清南斗闕干北斗明冉冉方悲老將至
纖纖又歎月初生酒牀細滴香浮瓮衣杵相聞聲滿城
萬卷讀書無用處却將耕稼報昇平

秋思

身似龐翁不出家一窗自了淡生涯山薑零落初成子
石竹淒涼半吐花寒澗挹泉供試墨墮巢篝火喚煎茶

掩關本意君知否兩耳衰年不耐譁

豐歲

豐歲驪聲動四隣深秋景氣粲如春
羊腔酒擔爭迎婦
鼉鼓龍船共賽神處處喜晴過甲子
家家築屋趁庚申
老翁欲伴鄉閭醉先辦長衫紫領巾

秋賽

柳姑廟前煙出浦冉冉縈空青一縷
須臾散作四山雲
明日來為社公雨小巫屢舞大巫歌
士女拜祝肩相摩

芳茶綠酒進雜運長魚大截高嵯峨常年徵科煩箠楚
縣家血溼庭前土妻啼兒號不敢怨期會常憂累官府
今年家家有餘粟縣符未下輸先足木刻吏蒲作鞭自
然粟帛如流泉儲積不愁無九年

小舟過吉澤效王右丞

澤園霜露晚孤村煙火微本去官道遠自然人迹稀木
落山盡出鐘鳴僧獨歸漁家間似我未夕閉柴扉

太息

自古才高每恨浮偉人要是出中州即今未必無房魏
埋沒塵沙死即休

闕輔堂堂墮遠塵渭城杜曲又逢春安知今日新豐市
不有悠然獨酌人

歲首書事

東風入律寒猶劇多稼占祥雪欲成

雲陰作雪彌旬至
開歲雪意愈濃明

日戌初立春猶
可為臘雪也

鬱壘自書誇腕力屠蘇不至歎人情

今歲

無餽屠蘇者

呼廬院落譁新歲

鄉俗歲夕聚博
謂之試年庚

賣困兒童起

五更

立春未明相呼賣
春困亦舊俗也

白髮滿頭能且健
剗隨鄰曲樂

昇平

菴中獨居感懷

無錢溪女亦留魚
有雨東家每借驢
藜粥數匙晨壓藥
松肪一椀夜觀書
黃紬被暖閒無厭
白布衫長樂有餘
南陌東阡春事動
放翁作計未全疎

春日園中作

杏花開過尚輕寒
盡日無人獨倚闌
久別名山憑夢到

每思舊友取書看塵埃幸已賒腰折富貴深知欠面團
老去逢春都有幾一杯行復送春殘

春日小園雜賦

市塵不到放翁家繞麥穿桑野徑斜夜雨長深三尺水
曉寒畱得一分花悶從鄰舍分春瓮閒就僧窗試露芽
自此年光應更好日驅秧馬聽縑車

春思

兀兀治顰酒未醒霏霏潑火雨初晴愁看入戶桃花片

閒聽爭巢燕子聲百疾侵陵成老大一春轉盼又清明
蘭亭禹廟渾如昨回首兒時似隔生

白樂天詩云倦倚繡牀愁不動緩垂綠帶髻鬟低
遼陽春盡無消息夜合花前日又西好事者畫
之為倦繡圖此花以五六月開山中多于茨棘
人殊不貴之為賦小詩以寄感嘆

王室東遷歲月賒兩京漠漠暗塵沙繡牀倦倚人何在
風雨漫山夜合花

蜉蝣行

蜉蝣至細能知時春風礧雨占無遺蜻蜒滿空乃不知
庭除一出無歸期樂哉蜻蜒高下飛蜉蝣未盡何憂饑
簷間蜘蛛亦伺汝吐絲織網腹如鼓

村舍雜書

中春農在野蠶事亦隨作手種臨安青

桑名

可飼蠶百箔

累累繭滿簇繹繹絲上簍老子雖安眠衣帛可無作

舍南種胡麻三日幸不雨晨起親按行已見青覆土窮

人如意少喜色漏眉宇兒童勿情偷造物不負汝

五月新麴成六月甘瓜熟作麴及良時火見金始伏懸

知桑落後醅面濃如粥再拜謝天公無功叨美祿

予家
釀用

宛丘瓜
麴法

折蓮釀作醢采豆治作醬開歷揆日時汲井滌甌盞上

奉時祭須下給春耕餉咨爾後之人歲事不可曠

東山石上茶鷹爪初脫韞雪落紅絲磴香動銀毫甌夾

如聞至言餘味終日留不知葉家白亦復有此不

逢人乞藥栽鬱鬱遂滿園玉芝來天姥黃精出雲門丹
茁雨後吐綠葉風中翻活人吾豈能要有此意存

軍興尚戎衣冠帶謝褒博禿巾與小裊顧影每懷忤及
今反士服始覺榮天爵出入阡陌間終身有餘樂

讀書乃一癖我亦不自知坐書窮至老更欲傳吾兒吾
兒復當傳百世以為期君看北山公太行尚可移

爵祿九鼎重名義一羽輕人見共如此吾道何由行湖
山有一士無人知姓名時時風月夕遙聞清嘯聲

陳阜卿先生為兩浙轉運司考試官時秦丞相孫以
右文殿脩撰來就試直欲首送阜卿得予文卷
擢置第一秦氏大怒予明年既顯黜先生亦幾
陷危機偶秦公薨遂已予晚歲料理故書得先
生手帖追感平昔作長句以識其事不知哀涕
之集也

冀北當年浩莫分斯人一顧每空羣國家科第與風漢
天下英雄惟使君後進何人知大老橫流無地寄斯文

自憐衰鈍辜真賞猶竊虛名海內聞

東堂睡起

置身事外息吾黥獨卧空堂一榻橫
簷影漸移知日轉樹梢微動覺風生
每從山寺開經帙閒就園公辨藥名
若論胸中淡無事八珍何得望藜羹

五鼓起坐待旦

睡覺初聞雞一鳴披衣危坐待窗明
殘軀已向閒中老癡夢猶尋熟處行
南北迢迢悲往事古今莽莽歎浮生

伯倫一鉢君休笑冢象祁連亦已平

遣興

湖海元為汗漫遊誤恩四領幔亭秋掃空薄祿始無媿
閉上衡門那得愁湯嫩雪濤翻茗椀火溫香縷上衣篝
牀頭亦有閒書卷信手拈來倦即休

書齋壁

平生憂患苦縈纏菱刺磨成芡實圓

俗謂田折多者謂菱角磨作雞頭

天下不知誰竟是古來惟有醉差賢過堂未悟鐘將響

睨柱寧知壁偶全自笑為農行沒世尚知驚雁落空弦
無酒歎

不用塞黃河不用出周鼎但願酒滿家日夜醉不醒不
用冠如箕不用印如斗但願身強健朝莫常飲酒造物
不少怨虐戲逐段新坐令古銅槥經月常生塵平生得
酒狂無敵百幅淋漓風雨疾造物欲以醒困之此老醒
狂君未知

舟中作

沙路時晴雨漁舟日往來村村皆畫本處處有詩材炊
黍孤煙晚呼牛一笛哀終身看不厭岸幘興悠哉

秋晚

木落寺樓出江平沙渚生牛羊下殘照鼓角動高城寒
至衣獨質憂多夢自驚羣狐方鬪穴河渭幾時清

西窗獨酌

却掃衡門歲月深殘骸况復病交侵平生所學為何事
後世有人知此心水落枯萍蘖破塊霜高丹葉照橫林

一樽濁酒西窗下安得無功與共斟

種蔬

老翁老去尚何言除却翻書即灌園處處移蔬藥小雨
時時拾礫繞顏垣江鄉地暖根常茂旱歲蟲生葉未繁
四壁愈空冬祭近更催耨子牧雞豚

新治暖室

小堂穩暖紙窗明低幌圍爐亦已成日閱藏經忘歲月
時臨閣帖雜真行詩材退後愁酣戰酒量衰來喜細傾

從此過冬那復事夜深時聽雪來聲

歲晚

無窮世事浩難量歲晚沈綿卧草堂
短褐圻圖移曲折故書經蠹失偏傍
賣刀擬買春耕犢挾筴曾亡舊牧羊
點檢生涯還自笑菜畦殘葉帶新霜

吳中冬
蔬常茂

齋中弄筆偶書示子聿

左右琴樽靜不譁放翁新作老生涯
焚香細讀斜川集候火新烹顧渚茶
書為半酣差近古詩雖苦思未名家

卷六十六
一窗殘日呼愁起
裊裊江城咽暮笳

新籬

新籬三面北通門
藤架陰中細路分
天雨淡青成卵色
水波微皺作靴紋
參差村舍穿林出
縹緲魚歌隔浦聞
忽覺楚鄉來眼底
欲題幽句弔湘君

村興

身老交情見孫生
口數添園丁上牛
米村婢博蠶鹽糶
糶堆盤白餠餽出
金甜閑門君勿誚
衰病正相兼

小圃獨酌

少時裘馬競豪華豈料今為老圃家
數點霏微杜公雨兩叢閒淡女郎花
詩成枕上常難記酒滿街頭却易賒
自笑邇來能用短只將獨醉作生涯

春日

方池潏潏碧波平曲徑纖纖細草生
席地幙天君但醉苦無多日是清明

雪山萬疊看不厭雪盡山青又一奇
今代江南無畫手

矮牋移入放翁詩

怕見公卿嬾入城
野橋孤店跨驢行
天公遣足看山願
白盡髭鬚却眼明

新晴野步

吹盡浮雲旋作晴
郊原高下水縱橫
煙蕪漫漫如漆色
谷鳥闐闐已變聲
迨酒賤時須痛飲
得人扶處儘閒行
隔湖遙指蘭亭路
鄰叟追隨羨眼明

夜行過一大姓家
值其樂飲戲作

村豪聚飲自相歡燈火歌呼鬧夜闌醉飽要勝饑欲死
看渠也復面團團

貧甚賣常用酒杯作詩自戲

桃李成塵渾不數海棠也作胭脂雨清明未到春先空
枝上流鶯替人語逢春日日合醉歸莫笑典衣窮杜甫
生時不肯澆舌本死後空持爵墳土門前三百里湖光
天與先生作醉鄉銀杯羽化不須歎多錢使人生窟郎

東園小飲

乞得殘骸老故山草亭終日對孱顏孤雲百尺起江際
幽鳥數聲鳴竹間衆死一身今獨健人忙萬物本常閒
此心欲語知誰聽賴有漁樵日往還

出

龜堂晚興

九日春陰一日晴回塘間院愜幽情小魚出水圓紋見
輕燕穿簾折勢成今日揜關真佚老向來涉世亦遺民
巡簷更有欣然處新筍初抽四五莖

宋詩鈔卷六十六

欽定四庫全書

集部
宋詩鈔卷六十七

詳校官中書臣賈鏐

主事銜臣徐以坤覆勘

總校官編修臣王燕緒

校對官中書臣劉源溥

謄錄監生臣鄭家屏

欽定四庫全書

宋詩鈔卷六十七

內閣中書舍人吳之振編

陸游劔南詩鈔

四

齋中雜興十首以丈夫貴壯健慘戚非朱顏為韻
成童入鄉校諸老席函丈堂堂韓有功英概今可想從
父有彥遠早以直自養始終臨川學力守非有黨紛紛
名它師有泚在其纘二公生氣存千載可畏仰

士生學六經是為聖人徒處當師顏原出當致唐虞斯
文陣堂堂臨敵獨援抱異端滿天下一掃可使無乃知
立事功先要定規模彼雖力移山安能奪匹夫

公議在天下如人有元氣平居失護養一旦可勝諱神
丹卒難求百疾起如蝟奄奄息僅屬熟視吁可畏大義
在春秋遺跡悲漢魏君看徐孺子底物視富貴

昔我自蜀歸耆舊已凋喪後來二三公尚慰天下望千
里一紙書殷懃問亡恙嗚呼亦已矣遺語寄悲愴我亦

迫桑榆便恐無輩行夜窓對清燈力憊心尚壯

餘齡垂八十雖憊猶強飯正如老病馬風沙時一噴玉
關眇何許道里何啻萬目中堠厯厯欲進不能寸矯首
望秋空徒羨霜鶻健羶骨亦何悲吾非麒麟植

琅琅誦詩書尚記兩髭髥誰料七十年沈滯終坎窞炊
突映茅廬日暮煙慘慘忍窮端已熟撫事空自感狂言
悔噬臍衆訾驚破膽尚有愛書心還如嗜菖歎

去國已酉冬忽見十頌厯衰殘口兩齒困阨家四壁時

看溪雲生飽聽簷雨滴悠然度寒暑何處若欣戚幽人
宜知我月夕聞吹笛何當五百歲相與摩銅狄

扁舟東下峽日月去若飛當時筆硯舊久已星晨稀俊
逸如伯渾簡詣如知幾天高鬼神惡回首萬事非我欲
泝黃牛買屋居青衣九原不可作哀哉誰與歸

荷鉏草堂東藝花二百株春風一朝來白白兼朱朱南
列紅薇屏北界綠芋區偃蹇雙松老森聳萬竹臞餘地
不忍弗揵援引瓠壺何當拂東絹畫作山園圖

閒居寂無客柴門晝常闔孤舟小於葉放浪煙水間樹
暗楊梅村露下白蓮灣釣魚樵風涇買酒石帆山向來
支許輩恐亦無此閒道逢若耶叟握手開蒼顏

觀畫山水

古北安西志未酬人間隨處送悠悠騎驢白帝城邊雨
挂席黃陵廟外秋大網截江魚可膾高樓臨路酒如油
老來無復當年快聊對丹青作卧遊

讀蘇叔黨汝州北山雜詩次其韻

暑耘日炙背寒耕泥沒脚衆人占膏腴我獨治硤确力
盡功未見厥土但如昨豈惟窘糠粃直恐轉溝壑今年
雨暘時天如相耕獲屋傾未暇扶且復補籬落

祠官粟一囊不贍軀七尺前年蒙寬恩例許乞骸骨聯
翩三兒子俱作鸛雀碧賦祿雖尚遠亦足慰衰白幅巾
茆簷下稱病謝來客從今門前路永掃車馬跡

德孫秀眉宇慨然修初服枯腸貯詩書十飯九不肉成
童將覓舉想見袍立鵠先澤儻未衰豈無五秉粟汝能

記吾言併以告阿福閉門勿雜交一經萬事足

枕上作

蕭蕭白髮卧扁舟死盡中朝舊輩流
萬里關河孤枕夢五更風雨四山秋
鄭虔自笑窮耽酒李廣何妨老不侯
猶有少年風味在吳牋著句寫清秋

示友

道向虛中得交從實處工
凌空一鶚上赴海百川東
氣骨真當勉規模不必同
人生易衰老君等勿怱怱

開東關路北至山脚因治路傍隙地雜植花草

清溝東畔剪蓁菅雖設柴門盡日闌遠引寒泉成碧沼
稍通密竹露青山幽花泣露開仍落好鳥穿林去復還
更上橫岡吾所愛小兒試覓屋三間

父子追隨一笑傾東園東畔路初成夾栽芳草如繩直
前出籬門似砥平春近野梅香欲動雨餘溝水細無聲
今朝有意誰能識不用人扶亦自行

病眼逢人每嬾開正須此地洗氛埃數枝梅向林梢出

一脈泉從嶺背來，藤杖有時緣石磴。
風爐隨處置茶杯，殘軀自笑如春草。
又喜天邊斗柄回。

連日治圃至山亭又作五字

好竹千竿翠新泉，一勺水殘蕪襯落。
日老木上寒藤細，磴欹難過危欄曲。
可憑歸時忽已暮，點點數漁燈。

歲暮書懷

世事從來不可常，把茆猶幸得深藏。
牀頭酒瓮寒難熟，瓶裏梅花夜更香。
薄命元知等蟬翼，畏途何處不羊腸。

金匱要略卷六十七
詩成讀罷仍無用聊滿山家骨董囊

初春感事

馬跡車聲是處忙經旬無客到龜堂水初泛溢黏天綠
梅欲飄零特地香世事紛紛人自老歲華冉冉日初長
百錢不辦旗亭醉空愛鵝兒似酒黃

先少師宣和初有贈晁公以道詩云奴愛才如蕭穎
士婢知詩似鄭康成晁公大愛賞今逸全篇偶
讀晁公文集泣而足之

仕不逢時勇退耕
閉門自號景迂生
遠聞佳士輒心許
老見異書猶眼明
奴愛才如蕭穎士
婢知詩似鄭康成
早孤遇事偏多感
欲續殘章涕已傾

追感往事

諸公可歎善謀身
誤國當時豈一秦
不望夷吾出江左
新亭對泣亦無人

紹興辛酉予年十七矣距今已六十年追感舊事

作絕句

常憶初年十七時朝朝烏帽出從師

與許子威輩同從
鮑季和先生晨興

必具帽
帶而出

忽逢寒食停供課正寫礬書作履碑

雨晴風日佳絕徙倚門外

茶釼無端廢午眠杖藜信步到門前青裙溪女結蠶卦
白髮廟巫催社錢

章老三年病方死吳翁一夕呼不醒獨有此身頑似鐵
倚門常看暮山青

春遊

春風隄上草萋萋草軟沙平護馬蹄似葢微雲纔障日
如絲小雨不成泥千秋觀裏逢新燕九里山前聽午雞
追憶舊遊愁滿眼綠船曾繫畫橋西

春雨

狼籍殘花滿地紅擁衾孤夢雨聲中人生十事九堪歎
春色三分二已空但有老盆傾獨酒不辭衰鬢對青銅
長貧博得身强健久矣無心咎化工

藥爐茶竈淡生涯聽雨猶能惜物華蘸岸頓添三尺水

沾泥不貸一城花間摩病眼看書卷時傍危欄弄釣車
稚子孤行八千里喜聞炊熟可還家

家僅自行在來報
子布寒食前可到

家唐人以寒食

前一日為炊熟

自笑平生嬾是真閉門高枕動兼旬海棠千片已隨水
杜宇一聲無復春綠酒盈樽足忘老朱櫻上市正嘗新
今朝雨止通溪路又向沙頭岸幅巾

三月十六日至柯橋迎子布東還

江國常年秋鴈飛吾兒遠客寄書稀道途一見相持泣

鄰曲聚觀同載歸
草草杯盤更起舞
匆匆刀尺旋裁衣
從今父子茆簷下
回首人間萬事非

我似傷禽帶箭飛
更憐女作鴈行稀
異時恐抱終身恨
此日寧甘徒步歸
萬里外應勞遠夢
三年前已挂朝衣
斷編蠹簡相從老
絕念功名亦未非

初夏野興

扇墮巾歌午夢回
鳴鳩又喚雨絲來
數行楮帖臨窗學
一卷陶詩傍枕開
糠火就林煨苦筍
蜜甕沉井漬青梅

艾人行復巍然出老大難堪節物催

衡門

曲徑衡門短短籬槐楸陰裏倚筇枝
老來百事不入眼
惟愛青山如舊時

朝飢示子聿

水雲深處小茆茨雷動空腸慣忍飢
外物不移方是學
俗人猶愛未為詩
生逢昭代雖虛過
外見先親幸有辭
八十到頭終強項
欲將衣鉢付吾兒

晨興

小雨過郊墟晨興一事無殘榴重結藥新燕續生雛書
細猶能讀行遲漸要扶疏畦恐蕪沒且復課僮奴

西村

亂山深處小桃源往歲求漿憶叩門高柳簇橋初轉馬
數家臨水自成村茂林風送幽禽語壤壁苔侵醉墨痕
一首清詩記今夕細雲新月耿黃昏

放歌行

少年不知老境惡意謂長如少年樂朝歌夜舞狂不休
逢人欲覓長生藥三二十年底難過屈指朋儕餘幾箇
就令未死身日衰朱顏已去誰能那人間萬事如奕碁
我亦曾經少壯時兒曹紛紛不須校歲月推遷渠自知

閉戶

收身歸水鏡湖傍閉戶悠悠白日長巷僻斷非容駟路
腸枯那有蹴蔬羊書生正可蹈東海世事漫思移太行
睡起不知天早暮坐看螢度篆盤香

長飢

病卧窮閭負聖時本來吾道合長飢朝不及夕未妨樂
如何如生行自知早年休學仗下馬末路幸似泥中龜
煙波一葉會當逝吹笛高人有素期

山齋書事

山榴子結又重開巢燕雛飛却續回

燕有三生雛乃去者

雨足人

畦千頃稻日長風舞一庭槐浩歌縱酒愁仍在作意觀
書睡已來常恨流年不相貸若為更著算蟬催

晚至新塘

青鞵隨意出柴荆聊向南唐曳杖行
歸鳥已從煙際沒斷虹猶在柳梢明
城頭層堦凌空立浦口孤舟竝岸橫
向道有詩渾不信為君擁鼻作吳聲

早秋南堂夜興

水注橫塘藻荇香候蟲唧唧滿空廊
風前落葉紛可掃天際疎星森有芒
夜漏漸長愁少睡秋衣未製怯新涼
明朝知有欣然處寫得黃庭又幾行

新涼書懷

藥物扶持病少蘇，殘年不恨老菰蘆。
潦收溪澗魚爭售，

歲樂村場酒易沽。無日檀林無墜葉，

檀木自夏至秋日有落葉不可勝掃

有時燕戶有新雛。

今年燕屋生雛七月望猶未止

秋風礫起扁舟興，安

得州家復鏡湖。

鄰曲今年又有年，垂髫戴白各欣然。
先輸官廩無逋賦，

共賽神祠有社錢。退傅寄聲情縝密，

連得周丞相書細字滿幅

晦翁

入夢語蟬聯。

昨夕夢朱元晦甚款

燈前細與兒曹說，蠹簡猶堪數

世傳

燒香

寶熏清夜起氤氲寂寂中庭伴月痕
小斲海沉非弄水
旋開山麝取當門蜜房割處春方半
花露收時日未曛
安得故人同晤語一燈相對看雲屯

枕上

呼兒初夜上門關怕冷貪眠自笑孱
月色橫分窗一半
秋聲正在樹中間
算年不復樽前樂
浮世無如枕上閒

鍊句未安姑棄置明朝追記尚斑斑

山園書觸目

山近雲生易人稀鳥下頻瘦篁穿石竅古蔓絡松身熟
摘巖邊果乾收澗底薪經過不相識喚作避秦人

村舍

篠屋風林下

山中人以篠覆
舍厚密過于茅

柴門芡浦旁先鳴雞膈膊

徐上日蒼涼服藥貧寧輟觀書老有常仍須教童稚世
世力耕桑

生理嗟彌薄吾居久未完蝶飛窗紙碎龜坼壁泥乾小

雨牛欄溼微霜碓舍寒晚禾蟲獨少鄰里共相寬

今年晚禾

苦蟲蛇子

鄉獨免

對食戲詠

一飽欣逢歲小穰時憑野餉誑枯腸橙黃出臼金羹美

蒜脆供盤玉片香客送輪囷霜後蟹僧分磊落社前薑

秋來幸是身強健聊為佳時舉一觴

懷昔

偶住人間日月長
細思方覺少年狂
衆中論事歸多悔
醉後題詩醒已忘
鼉作鯨吞吁莫測
谷堙山塹浩難量
老來境界全非昨
卧看紫簾一縷香

賽神

歲熟鄉鄰樂辰良
祭賽多荒園拋鬼飯
高机置神鵝

村人

謂祭神之牲
曰神猪神鵝

人散叢祠寂
巫歸醉臉酡
飢鴉更堪笑
鳴

噪下庭柯

小立

紅樹園廬晚碧花籬落秋荒陂船護鴨斷岬笛呼牛酒
賤村村醉山寒寺寺幽聊須岸烏幘小立埭西頭

秋晚湖上

已過西成賽廟期家家下麥不容遲夕陽遍野人歸後
秋水生灘鷺集時靈藥不治懷抱惡好詩空益鬢毛衰
從來未識蘇司業愁絕西風滿酒旗

明日又至山園天微陰再賦

河岸風檣遠村陂牧笛長短籬圍麋眼幽徑繚羊腸照

水鬚眉見搓橙指爪香衣裘又闕念礎杵滿斜陽

不寐

麗譙聽盡短長更幽夢無端故不成寒雨似從心上滴
孤燈偏向枕邊明讀書有味身忘老報國無期涕似傾
敢為衰殘便虛死誓先鄰曲事春耕

弊廬

弊廬雖陋甚鄙性頗所宜歌傾十許間草覆實半之碓
聲隔柴門續火出枳籬縛木為氣牢附垣作雞埒黃犢

放林莽蒼鵝戲陂池傭耕食于我客主同爨炊瓦盎設
大杓菹菹羹園葵一飽荷鋤出作勞非所辭上以奉租
賦下以及我私有錢即沽酒阡陌恣遊嬉亦有扶持者
婢跣奴髻椎欲畫恨無人後世考此詩

園中作

誰采枕柳寄一枝北來萬里為扶衰風光最愛初寒候
懷抱殊勝未老時閒引微泉成曲澗盡除枯蔓補疎籬
花前自笑童心在更伴羣兒竹馬嬉

夜四鼓睡覺起行簷間觀新作南籬

星斗闌干天宇清
起披短褐繞廊行
葉聲颯颯飛霜重
籬影疎疎落月明
沙冷斷鴻投別浦
風高殘漏下孤城
衰遲自笑情猶在
一首新詩取次成

客去追記坐間所言

征西幙罷幾經春
歎息兒音尚帶秦
每為後生談舊事
始知老子是陳人
建隆乾德開王業
溫洛榮河厭騎塵
倘得此生重少壯
臨危敢愛不貲身

追憶征西幙中舊事

大散關頭北望秦
自期談笑靜邊塵
收身外向農桑社
何止明明兩世人

小獵南山雪未消
繡旗斜卷玉驄驕
不如意事常千萬
空想先鋒宿渭橋

憶昨王師戍隴回
遺民日夜望行臺
不論夾道壺漿滿

洛筍河魴次第來

在南鄭時關中將
更有獻此二物者

關輔遺民意可傷
蠟封三寸絹書黃
亦知作法如秦酷

列聖恩深不忍忘

閏中將校密報事宜
皆以蠟書至宣司

冬夜

颼颼黃葉欲辭枝
况著霜風抵死吹
投老難逢身健日
讀書偏愛夜長時
孤村月白聞衣杵
破竈煙青煮芋糜
不是用心希陋巷
為儒自合耐寒飢

冬日

室中恰愛一蒲團
也抵三千世界寬
上策莫如扃戶坐
苦閒猶復取書看
蔬飯輒枝梧老窗
白爐新準備寒

堪笑此翁幽獨慣却嫌兒女話團圓

寒夕

夜叩銅壺徹旦吟了無人會此時心
燈殘焰作孤螢小火冷灰如積雪
深風急江天無過雁月明庭戶有疎碁
此身畢竟歸何許但憶藏舟黃蘗林

辛酉冬至

今日日南至吾門方寂然家貧輕過節
身老怯增年

俗鄉

謂喫冬至飯
卽添一歲

畢祭皆扶拜分盤獨早眠惟應探春夢已

繞鏡湖邊

客至

何處軒車客能來桑麥村一奴先入市此老自磨門野
果嘗皆澀村醅壓尚渾殘年亦何恨治世作黎元

冬夜讀史有感

短檠膏涸夜將殘感事懷人興未闌酌酒淺深須自度
圍棋成敗有旁觀斷齏作飯終年飽大布裁袍稱意寬
世上閒愁千萬斛不教一點上眉端

小飲梅花下作

脫巾莫歎髮成絲六十年間萬首詩

予自年十七八學作詩今六十年得

萬篇

排日醉過梅落後通宵吟到雪殘時偶客後成寧非

幸自乞歸耕已恨遲青史滿前閒即讀幾人為我作著龜

箕卜

孟春百草靈古俗迎紫姑厨中取竹箕冒似婦帟襦豎子夾扶持挿筆祝其書俄若有物憑對禽不須更豈必

考中否一笑聊相娛詩章亦間作酒食隨所須興闌忽
辭去誰能執其袪持箕畚竈婢棄筆卧牆隅几席亦已
徹狼籍果與蔬紛紛竟何益人鬼均一愚

梅花絕句

幾年不到合江園說著當時已斷魂只有梅花知此恨
相逢月底却無言

當年走馬錦城西曾為梅花醉似泥二十里中香不斷
青羊宮到浣花溪

聞道梅花圻曉風雪堆遍滿四山中何方可化身千億

一樹梅前

一作花

一放翁

小亭終日倚闌干樹樹梅花看到殘只怪此翁常謝客
元來不是怕春寒

亂簦桐帽花如雪斜挂驢鞍酒滿壺若得丹青如顧陸
憑渠畫我夜歸圖

紅梅過後到絳梅一種春風不並開造物無心還有意
引教日日放翁來

送子龍赴吉州掾

我老汝遠行知汝非得已
駕言當送汝揮涕不能止
人誰樂離別坐貧至于此
汝行犯胥濤次第過彭蠡
波橫吞舟魚林嘯獨脚鬼
野飯何店炊孤權何岸議
判司比唐時猶幸免筭篋
庭參亦何辱負職乃可耻
汝為吉州吏但飲吉州水
一錢亦分明誰能肆讒毀
聚俸嫁阿惜擇士教元禮
我食可自營勿用念甘旨
衣穿聽露肘履破從見指
出門雖被嘲歸舍却睡美
益公名位重凜若

喬嶽峙汝以通家故或許望燕几得見已足榮切勿有所啟又若楊誠齋清介世莫比一聞俗人言三日歸洗耳汝但問起居餘事勿挂齒希周有世好敬叔乃鄉里豈惟能文辭實亦堅操履相從勉講學事業在積累仁義本何常蹈之則君子汝去三年歸我儻未即歿江中有鯉魚頻寄書一紙

六日雲重有雪意獨酌

遍遊藪澤一漁舸盡歷風霜只緼袍天為念貧偏與健

人因見嬾誤稱高地連海澨濤聲近雲冒山椒雪意豪
偶得名罇當痛飲涼州那得直蒲萄

舟中作

娥江西路石帆東身寄鷗波浩蕩中疊疊沙痕留浦岬
疎疎日影透漁篷詩人無復同盟在酒債何時一洗空
已迫耄年宜易感人生五十即稱翁

晤語無人與遣愁出門聊復弄輕舟山穿煙雨參差出
水赴陂塘散漫流隔葉雄雌鳴谷鳥傍林子母過吳牛

數家清絕如圖畫炊黍何妨得小留

湖村春興

桑柘相望雨露新桃源自隱不緣秦稻陂正滿初投種
蠶子方生未忌人酒借鵝兒成淺色魚憑雲母作脩鱗
賽神歸晚比鄰醉一笑猶關老子身

村居書事

藥物枝梧病漸蘇門前野老笑相呼春深水暖多魚婢
雨足年豐少麥奴小飲盃盤隨事具閒行巷陌倩人扶

題詩非復羌村句誰與丹青作畫圖

李伯時有羌
月圖傳於世

題廬陵蕭毓秀才詩卷後

詩句雄豪易取名爾來閒淡獨蕭卿
蘇州外後風流絕幾許工夫學得成

法不孤生自古同癡人乃欲鏤虛空
君詩妙處吾能識正在山程水驛中

示客

一點昏燈兩部蛙客來相對半甌茶
典衣未贖身饒虱

治米魚工飯有沙每為采菱浮野艇時因賣藥宿山家
青鞋到處堪棄興不獨雲門與若耶

喜晴

葛衣初著喜新晴寂寂虛堂一榻橫乍坼孤花藏葉鏤
晚歸雙燕拂簾旌舞空不斷游絲直掠地還飛落絮輕
剝欲倚闌尋好句清笳已復動高城

閒詠園中草木

剪刀葉畔戲魚回帔子花頭舞蝶來
領畧年光屬閒客

一樽自勸不須推

一樹山櫻鳥啄殘
懸鉤半舍亦甘酸
兒童采得爭來餉
應念衰翁舌未乾

綠侵小徑蔓衣草
青絡疎籬鬼帶藤
未暇開編尋本草
且將名品問山僧

過鄰家

老病在臂蹠終日
不喜動溪雲忽過
前袖手以目送今
晨光景佳霽色入
鳥哢駕言出柴荆
暫作湖山夢東村

望鶴巢西阜過獮峒父老意欣然為我撥春瓮豈惟澆
舌燥亦用輭脚痛形骸去繩檢談笑得少縱吳蠶初上
簇陂稻亦已種端午數日間更約同解糴

九月初作

九月都門凜欲霜羸軀恩免立鴈行細書付吏牒初橐
和藥呼兒對古方陋巷閉門當謝客高齋掃地獨焚香
此生自計終何取似有山林一日長

實錄有初
橐二臺

無客

今日了無客脩然塵柄閒硯涵鴈鵠眼香斲鷓鴣斑木
落風初勁雲低雨尚慳西湖未暇到卧看曲屏山

懷故山

老怯京塵化素衣無端拋擲釣魚磯碧雲又見日將
暮芳草不知人念歸萬事莫論羈枕夢一身方墮亂
書園岷山學士無消息空想燈前語入微

張季長秘閣久不得

書

晚歸

無事經秋別鏡湖詩囊隨處累奚奴樓頭寒日低將盡
陌上殘泥踏欲無軒冕豈容闕喜慍簞瓢亦未費枝梧
畫橋綠浦歸來晚一酸昏燈得自娛

題史院壁

白髮無餘鬢蒼顏失故丹旅遊多敗意大屋每饒寒出
畏霜侵褐歸窳日暖鞍若非時得句何以慰衰殘
苔甃平分路銅環半掩扉殘蕪寒不舛敗葉落還飛責
重何由塞愁生但念歸非無茅一把世事苦相違

寄題儒榮堂

朝散大夫徐夢莘著北盟錄上之除直秘閣訓辭有儒榮之語因以名堂

來求

賦詩

軍容基旤廟謀疎尚記文登遣使初只道大功隨指顧
至今遺惠費誅鋤還朝不遣參麟筆寓直空聞上石渠
剗辦殺青君記取磨崖碑待魯公書

雜興十首以貧堅志士節病長高人情為韻

仕宦徧四方每出歸愈貧寒暑更質衣笑倒鄰里人今
年作史官坐廢太倉陳無如思歸何日夜望絕麟區區

牛馬走齷齪蟻蝨臣恩深老不報肝膽空輪囷

孟子闢楊墨吾道方粲然韓愈排佛老不失聖所傳伐木當伐根攻敵當攻堅坐視日月食孰探天地全一木信難恃要憂大厦顛安得孟韓輩出為吾黨先

聖人固多能藝乃不以試嗟予少貧賤日月成坐棄矧今耄已及甘食而美睡道衰朋友散斯文凜將墜閉戶輒竟日孰與講仁智厭厭生意盡何暇議李志

少年喜結交患難謂可倚寧知事大謬親友化虎兕出

仕五十年危不以讒死始畏囊中錐寧取道旁李老來
多新知英彥終可喜豈以二三君遂疑天下士

替我遊廬山夜雨東林雪灰深火正熟膏滅燈半滅童
驚林虎過僧惜澗松折至今每追思可解肺肝熱那知
蓬山夢忽繼此清絕殊勝蘇子卿餐羶持漢節

觀人如觀玉拙眼喜譏評得失顧在人玉固非所病慶
厯嘉佑間人才於斯盛王回僅一招石介棄不聘乃知
天下士成敗各有命願君姑安之天定豈不勝

兩山如峨眉一水若車輞吾昔廬其間百里臨莽蒼少年手藝木條榦日夜長咿啞駕獨轅迢遞搖兩漿平生會心地今乃寄夢想何時喚鄰翁煙水行布網

貨財不可居祿位不可饗我爾本一家何至臯蘭麝小夫謀人國紛紛日煎熬或謂性本惡或謂經無褒誤人方自此孰如飲醇醪清言亦自佳遺事非徒高

魯山粹而博韶美曠且真石渠東觀中久矣無若人飛仙驂鳳鸞豈久混世塵空餘文章在常與日月新我雖

不足數疇昔忝交親尚想秋燈下對影歆幅巾

陳山魯
山劉儀

鳳韶

美

君子尚大節又甚惡不情魯連故可人用意終近名千
載高夷齊采薇忘其生周公述易象所以貴幽貞去聖
雖已遠江左見淵明我讀飲酒詩朱絃有遺聲

謝韓實之直閣送燈

玉作華星綴絳繩樓臺交映莫天澄東都父老今誰在
腸斷當時諫浙燈

舊友年來不作疎華燈乃宵寄蝸廬寧知此老蕭條甚
二尺檠前正讀書

歎老

鏡裏蕭蕭白髮新默思舊事似前身齒殘對客豁可耻
臂弱學書肥失真漸覺文辭乖律呂豈惟議論少精神
平生師友凋零盡鼻堊揮斤未有人

冬曉

思免宵興起曉斑養慵終覺媿吾顏浮名半世虛催老

高卧何時復得閒
兩岬夕陽漁浦市
數峰寒靄沃洲山
扁舟來往無窮樂
此事天公豈所慳

有懷梁益舊遊

土堠纍纍隻復雙
悠悠殘夢對寒缸
亂山落日葭萌驛
古渡悲風桔栢江
虎印雪泥餘過跡
樹經野火有空腔
四方行役男兒事
常笑韓公賦下瀧

孤坐無聊每思江湖之適

世上元無第一籌
此身只合卧滄洲
艣搖漁浦蒼茫月

帆帶松江浩蕩秋有酒人家皆可醉無僧山寺亦閒遊
老來閱盡榮枯事萬變惟應一笑訓

子聿欲暫歸山陰見乃翁作惡遂不行贈以此詩
鐘鳴豈復夜行時文字相娛賴此兒欲去復留知汝孝
未言先泣歎吾衰兩篇易象能忘老百畝山畬可免飢
但報家僮多釀酒一欄紅藥是歸期

明年春晚史院
奏書必得歸矣

暇日弄筆戲書

草書學張顛行書學楊風平生江湖心聊寄筆硯中龍

蛇入我腕足素忽已窮餘勢尚隱鱗此興嗟誰同

謝王子林判院惠詩編

王從楊廷秀甚久

文章有定價議論有至公我不如誠齋此評天下同王
子江西秀詩有誠齋風今年入修門軒軒若飛鴻人言
誠齋詩浩然與俱東字字若長城梯衝何由攻我望已
畏之謹避不欲逢一日來叩門錦囊出幾空我欲與馳
逐未交力已窮太息謂王子諸人無此功騎驢上灞橋
買酒醉新豐知子定有人豈必老鈍翁

對酒作

美門安期何在哉
河流上折崑崙開
白雲不與隱居老
孤鶴自下遼天來
春江風物正開美
綠浦潮平桺初起
算吹長笛發巴陵
曉挂高帆渡湘水
世間萬變更故新
會當太息摩銅人
脫裘取酒籍芳草
與兄共醉壺中春

西湖春遊

靈隱前天竺後鬼
削神剗作巖岫冷
泉亭中一樽酒一
日可敵千年壽
清明後上巳前
千紅百紫爭妖妍
蓂蓂

鼓聲鞠場邊鞦韆一蹴如登仙人生得意須年少白髮
龍鍾空自笑君不見灞亭耐事故將軍醉尉怒訶如不
聞

局中春興

天知病眼困風沙借與蓬山閱物華微暝已迎新到燕
輕陰猶護欲殘花幽窗寂寂書圍座倦枕時時夢過家
立馬庭前還小駐不妨閒試半甌茶

春日絕句

吏來屢敗哦詩興
雨作常妨載酒行
忽見家家插楊柳
始知今日是清明

故園蛺蝶最多種
百草長時花亂開
窮巷春風元不到
一雙誰遣過牆來

桃李吹成九陌塵
客中又過一年春
餘寒漠漠城南路
只見鞦韆不見人

便恐東皇促駕回
小軒無事且銜盃
不知何處桃花落
一片飛從屋角來

楊家園裏醉殘春
醉倩傍人拾墮巾
紅紫飄零不須數
東君渠自是行人

東軒花時將過感懷

小軒風月得婆娑
盡付流年與嘯歌
細數一春今過半
正令百歲亦無多
還家常恐難全璧
閱世深疑已爛柯
只欲閉門摅倦枕
晚風無奈落花何

社雨晴時燕子飛
園林何許覓芳菲
江山良是人誰在
天地無私春又歸
殘史有期成汗簡
修門即日挂朝衣

人生念念皆堪悔敢效淵明歎昨非

與兒輩泛舟遊西湖一日間晴陰屢易

逢著園林即款扉酌泉鬻筍欲忘歸楊花正與人爭路
鳩語還催雨點衣古寺題名那復在後生識面自應稀
傷心六十餘年事雙螯依然在翠微

得子聿到家山後書

日日春陰愁出戶汝今恰遇十分晴桑林紫椹纍纍熟
稻隴青秧漫漫平夢好定知行路健書來深慰倚門情

河橋道上山如畫
早晚歸舟聽鶻聲

春晚

新綠成陰小雨時
幅巾蕭散與閒宜
燕歸赴訴經年別
鶯晚分疏出谷遲
曉枕呼兒投宿酒
算窗畱客算殘基
條然此意風塵表
正恐羲皇未必知

上章納祿恩界外祠遂以五月初東歸

身似霜松老不枯
乞骸猶得侍清都
百錢濁酒渾家醉
六月飛蟲徹曉無
美睡不愁閒客攪
出遊自有小兒扶

買山尚恐巢由笑敢問天王覓鏡湖

羣玉峰頭孤夢斷五雲溪上野舟回
傍人鷗鳥自然熟到處藕花無數開
麥飯不饜常面槁柴門閒掩自心灰
雨來正作盆山地不怕冥冥半月梅

此身惟有一躬耕乞得餘年樂太平
東觀並遊收昨夢西湖重到付來生
一堤草露明晨照半浦荷風颭晚晴
歷歷歸途皆勝事江亭先聽櫂歌聲

初歸雜咏

雪滿漁蓑雨墊巾超然無處不清真
胃中那可有一事
天下故應無兩人騎馬每行秋棧路
喚船還渡算江津
酒樓僧壁留詩徧八十年來自在身

小園五畝翦蓬蒿便覺人間迹可逃
盡疏珍禽添爾雅
更書香草續離騷藥苗可斲攜長鑱
黍酒新成壓小槽
老入鵝行方徹悟一官何處不徒勞

乞得身歸且浩歌蕭然生世寄漁蓑
茶甘半日如新啜
墨妙移時不再磨
山寺蹋雲頻獨往鄰家穿竹自相過

棊枰勝負能多少堪笑傍人說爛柯

遊山

古寺不來久入門空歎嗟僧亡猶見塢樹老已無花世
事雖難料吾生固有涯慙慙一梳月十里伴還家

美睡

老來胃次掃崢嶸投枕神安氣亦平漫道布衾如鐵冷
未妨鼻息自雷鳴天高斗柄闌干繞露下雞埒膈膊聲
俗念絕知無起處夢為孤鶴過青城

宋詩鈔卷六十七